



Synfocity = 858

mail us at : mzsynfo@gmail.com; mizoramsynod@gmail.com - Phone - 2314648

September 15, 2022

❑ Senior Department Inkhawmpui

September 18, 2022 (Pathianni) hi Naupang Sunday School Department hnuai Senior Department Inkhawmpui Ni a ni a, Presbyterian Kohhran hnuai Bial leh Kohhran hrang hrangah Senior Department Inkhawmpui hi hman a ni ang. Bial thenkhatah chuan inrinni zan aṅanga nei ṅan an awm bawk.

Inkhawmpui hman dan tur hi Bial Sunday School Committee kut anih avangin Bial hrang hrang te kalpui dan erawh a dang deuh hret hret hlawm. Bial thenkhatah intihsiak anga kalpui anih laiin, thenkhatah chuan Speaker te sawma intawhkhawm anga hmangin, Kohhran tin ten Item an nei a. Tin, Speaker nei lem lova Intawhkhawm anga hmang pawh an awm ṅhin bawk.

Kum 1947 Sunday School Committee chuan, "Nula leh Tlangval Sande Sikul Pawl zirlai hran neih rawtna kha a la ding zel a, zawiin la ngaihtuah se tih a ni" tiin a rel a. Tichuan Senior Department hi kum 1954 aṅang khan neih ṅan a lo ta a. Kum 2021 Synod Inkhawmpui report-a a lan danin MSSU hnuai hian Senior department zirlai 25,655 leh zirtirtu 4,262 an awm mek a ni.

❑ Synod Mission Board leh ram pawn chet velna

◆ Jharkhand Mission Field

September 10, 2022 (Inrinni) khan Sarwapani Biak In, Karbindha Pastor Bial a mi chu Upa Vanlalngbaka, Ramhlun Kohhran-in a hawng a. He Biak In thar hi Ramhlun Kohhranin an sak a ni.

September 11, 2022 (Pathianni) khan chhungkaw hnih (member 10) chu Lal Isua zui turin an inpe bawk.

◆ Delhi Mission Field

September 11, 2022 (Pathianni) khan mi 15 Lal Isua zui turin an inpe.

◆ Arunachal & Assam Mission Field (East)

September 11, 2022 (Pathianni) khan mi 7 Lal Isua zui turin an inpe.

◆ Arunachal & Assam Mission Field (West)

September 11, 2022 (Pathianni) khan mi 2 Lal Isua zui turin an inpe.

❑ Synod Prison Ministry

September 8 - 11, 2022 chung khan District Jail, Armed Veng-ah Gospel Crusade neih a ni a, he Crusade-ah hian Lalrempuia, Kulikawn chu Speaker a tan hman a ni.

Crusade-ah hian chawhma leh chawhnuah te hun hman niin Speaker hnen aṅangin thuchah ṅum riat ngaihtlak a ni a, Crusade bul ṅan aṅanga a tawp thlengin inkhawm zai boruak a ṅha a, tang zinga duty nei leh damlo (khum bet) tih loh chu inkhawm an kokim hle. Sual avanga hrehawm nasa tak tuar tawh, Jail tang mek ten Krista avanga mahni hrehawm pawisa lo va, nitin kraws pua Isua zui tūrin an inhlan thei a ni.

Crusade chungin zaithiam Ruth Lalmalsawmi, Bungkaw; Maruati, Chanmari te bakah ṅang mēkte aṅangin Solo leh Male Voice ṅum hnih ve ve an zai bawk a. Crusade hlawhtling tak an hmang thei a ni.

❑ KṽP

Kum 2022-2024 Synod Choir term te chuan an music video hmasa ber 'Ka fak tawk zo lo'ng' tih chu Sept. 13, 2022 (Thawhlehi) zan khan an tichhuak.

Synod Choir music video thar 'Ka fak tawk zo lo'ng' tih hla hi Thawhlehi zan khan Rev. Dr. F. Pachhunga, Central KṽP Leader chuan Pathian hnenah hlanin a tlangzarh a. Tlangzarhna inkhawm hi Choir Cabin, Synod Conference Centre-ah hman a ni. He hla hi R. Vanlalruata, Synod Choir member lehlin a ni a, Kings & Prophets-ah recording tih niin HC Recording chuan mixing an khawih a, a music hi Muanpuia kutchhuak niin, Milestone Picture-in a video an khawih thung.

Synod Choir 2022-2024 hi rawngbawlin an chhuak ṅan mek a, sawmna pawh eng emaw zat a awm tawh bawk. Member hi mi 24 niin an conductor Tv. Benjamin Pazawna nen mi 25 an ni.

❑ Trust

September 13, 2022 (Thawhlehi) khan West Phaileng Dinthar-ah Pastor Quarters sak enpuin Pu Lalhriatrenga, JE a kal.

❑ **Synod Social Front**

September 18, 2022 (Pathianni) hian Phuaibuang Bialah Social Front Campaign nei turin Resource Person te Rev. Dr. Tlanghmingthanga leh Rev. Dr. Malsawmzoliana leh zaithiam NI. Zoremi Ralte te an kal ang.

❑ **Synod Campus Ministry**

September 18, 2022 (Pathianni) hian Senior Department Inkhawmpui hmanpuiin hetiang hian an kal ang.

- Lallen Bial - Rev. R. Ramnghinglova, Director leh Tv. Lalrinchhana, Counsellor
- Ruantlang Bial - Upa Dr. Samuel V.L Thlanga
- Champhai Vengthlang Bial - Upa Lalnunsiam Khalthang

❑ **Synod Relief Fund**

Tun hnaia harsatna hrang hrang nei te hnenah Synod Relief Fund atangin hetiang hian chhawmdawl na pek a ni.

S.No	Khua	Pek chhan	Chhungkaw zat	Pek zat
1.	Republic Veng	Leimin tuar	1	Rs. 10,000/-
2.	Chhingchhip Venglai	Tuilian tuar	1	Rs. 10,000/-
3.	Nalzawl	Khawsak Harsa	1	Rs. 8,000/-
4.	Aibawk	Damlo	1	Rs. 8,000/-
5.	Saitual	Damlo	1	Rs. 8,000/-
6.	Tuidam	Damlo	1	Rs. 8,000/-
7.	Tumpanglui	Rualbanlo	1	Rs. 5,000/-
BELHKHAWM				Rs. 57,000/-

August 2022 chung khan Synod Relief Fund atangin harsatna hrang hrang nei damlo leh vanduaina tawk te hnenah chhawmdawl na Rs. 3,18,000/- sem a ni.

❑ **Sunna: C. Lalhlimpuii, kum 40 (Missionary)**

Pi C. Lalnunhlimi hi September ni 13, 2022 zing dar 6:30 khan Synod Hospital, Durtlang-ah a thi a, chawhnu dar 1 khan an chenna in Luangmual-ah Rev. Dr. C. Lalramchhana, Synod Mission Board member leh MTC Principal-in a vui.

Pi C. Lalnunhlimi hi March 17, 1982 khan Pu C. Darsiamah leh Pi Laltanpuii, Luangmual te fa panga zinga a naupang ber ni turin Luangmual-ah a lo piang a, unau mipa 2 leh hmeichhia 2 a nei a ni.

Pi C. Lalnunhlimi hi November 21, 2019 khan Lalremfela, Mualpheng nen Mualpheng Prebyterian Kohhranah Biak Inah an innei a ni.

Kum 1987 khan JJ School, Bawngkawn-ah Nursery atanga Class II thlang a kal a. Luangmual Primary School-ah Class IV a kal leh a, Luangmual Middle School-ah Middle a zo leh a. KM High School-ah Matric a zo a, Govt. Mizo Higher Secondary School atangin pawl 12 zovin Govt. Aizawl College atangin BA a zo leh a ni. Kum 2005-ah ATC-ah BD a zir a, BD a zir zawh hian kum 2 chung Presbyterian English School, Luangmual-ah a thawk a, chumi hnuah Divine Intervention School leh Presbyterian English School, Khawzawl-ah a thawk leh a, chumi hnuah M.Th Missiology zir lehin M.Th a zir zawh hian Missionary Training College-ah Lecturer hna a thawk a. Kum 2016 January thla khan Delhi Mission Field (Chandigarh)-ah Evangelist-in a awm a, kum 6 a thawh hnu January 2022 khan Winchester-ah Evangelist Teacher-in a pasal Pu Lalremfela nen an thawk leh a ni. Kum 2014 atang khan Evangelist hna hi thawk tanin a boral thlengin he hna hi a thawk a ni.

Kumin January 4-a Chandigarh atanga Winchester Boarding-a an haw chu Compound-ah Mass Covid Test an nei a, hetah hian an nupa-in an positive a, an dam veleh mai a, amaherawhchu a khuh a reh hlei theilo a ni. June ni 25, 2022 khan Synod Hospital, Durtlang-ah phurh chhoh niin admit nghal a ni a, Pneumonia a lo ni a. July ni 3 khan ICU luhpui a ni a, July ni 7-ah a chhuak leh a. July ni 9-ah ICU ah dah luh leh niin August ni 31 khan a chhuak leh a ni. Hetia ICU atanga a chhuah leh hnu hi chuan Oxygen pawh a hming chauhin a kal tawh a ni.

September 11 atang khan a vai chho leh tan a, a kua a dik loh bakah hemi atang hian a muhil thei ta lo a, harsatna dang erawh a nei lem lo a ni. September 12 zana a u Ramngheti'n tui taka a mutthilh theih nana a tawngtaisak hnuah hla a ngaithla a, heta a muhil hi a chawl hlen ta a ni.

- ❑ **SEPTEMBER 16, 2022 (Zirtawpni) (FM Zoawi - Aizawl & Lunglei @ 7:30 p.m.):**
Solo : Ruth CVL Muanpuii - Ka lo kal e, **Zaipawl :** Champhai Kahrawt Bial Zaipawl - Pakhatmah,
Thusawi : Rev. Joseph Lalnunmawia - Bible Pathian thu, **Solo :** Jennifer Lalremruati - Ka thlang ber
 che, **Zaipawl :** Darlawn Bial Zaipawl - Thlarau thianghlim
- ❑ **Susamachar Prasaran Programme :**
SEPTEMBER 18, 2022 (Pathianni) 5:00 pm. :
Group/Choir/Solo : Sihphir Masihi Sangati - Kruspar, **Group/Choir/Solo :** Chanmari West -
 Yesu Mere, **Sermon :** Rev. Vanlalbela - Isu Jevan Data He, **Group/Choir/Solo :** Soni Lalnunsangi
 - Ashantima, **Group/Choir/Solo :** Hmingtea Tochwawng - A nugra ha kari
- ❑ **Moderator leh Executive Secretary-te Programme:**
Rev. Dr. Vanlalnghaka Ralte : Moderator
 Sept. 16 - 23, 2022 Kohhran tlawh, Bangalore
Rev. C. Zoramawia : Senior Executive Secretary
 Sept. 20, 2022 Praise On hlan
 Sept. 21, 2022 Synod Rescue Home Day hmanpui
 Sept. 22, 2022 North Hlimen Pastor Quarters hawn leh zirchian
Rev. V.L. Luaia Hranleh : Executive Secretary
 Sept. 19, 2022 SMTC Managing Committee
 Sept. 22, 2022 Synod Hospital Consultative Committee
 Sept. 23 - 26, 2022 Pdeng Provisional Synod hawna, Shillong
Rev. Dr. K. Lallawmzuala : Executive Secretary
 Sept. 14, 2022 PCI Working Committee, Shillong
 Sept. 16 - 24, 2022 Field Committee - Tripura, Karbi Anglong leh Assam

KOHRAN PAVALAI PAWL HRIATTIRNA

Sept. 30 - Oct. 2, 2022 chhunga Rampum huap Kohhran Pavalai Pawl Intawhkhawm lo awm turah Kohhran Pavalai Pawl member zawng zawng te kal vek tura sawm kan ni e.

Sd/-
Revival Director

KOHRAN HMEICHHE HRIATTIRNA

Mizoram Presbyterian Kohhran Hmeichhiate enkawl Women Centre, Phunchawng-ah kum 2023 chhung atan Puanthui leh Puantah zir dilna hawn a ni leh ta a. Presbyterian Kohhran Dan chhunga awm tan dil theih a ni. Puanthui hi kum khat zir tur a ni a, Puantah zirna erawh chu kum khatah Batch 3 (January - April, May - August, September - December) a ni ang. Puanthui zir tur mi 40 leh Puantah zir tur Batch tin atan mi 10 zel lak tur a ni a. Dilna Form chu Bial tin Kohhran Hmeichhe Secretary hnenah leh Kohhran Hmeichhe Dept., Synod Office-ah lam theih a ni. Dilna Form la chhuak remchang lo tan Bial tin Secretary hnenah PDF thawnchhuah a ni, Dilna hi Office lama thehlut thei lote tan a hnuai Phone No. tarlanah te hian Online pawhin thehluh theih a ni.

1. Dil theih hun chhung : Ni 16.11.2022 (Nilaini) chawhnu dar 2 thleng
2. Interview : Ni 18.11.2022 (Zirtawpni) 10:00am
3. A hmun : Committee Room - I, Synod Office
4. Centre-a luh hun : Ni 13.1.2023 (Zirtawpni)

Dilna chu heng number-ah hian WhatsApp hmangin a thawn theih ang
 9862306787 / 8731000964

Sd/-
Rev. VL Luaia Hranleh
Executive Secretary i/c Kohhran Hmeichhia